




med. 1022

TSBIBLIOTHEEK GENT



0000158392



6
1022.
A. P. NAHUY S

A. L. M. Philosophiæ & Medicinæ Doctoris

ORATIO

De Quæstione illa: Utrum Uroscopus
ex sola Urinæ inspectione Morbos
quorumvis Ægrotantium rite
detegere, iisque ex Arte
mederi possit.

PUBLICE DICTA

HARDEROVICI

IN AUDITORIO MAJORE

Die 30 Junii MDCCLXI.

THE UNIVERSITY OF CHICAGO
LIBRARY

1900

1900

1900


1900

1900

1900

1900

1900



ACADEMIÆ DUCATUS GELRIÆ ET COMITATUS ZUTPHANIÆ CURATOR, VIR GENEROSISSIME.

MAGNIFICE RECTOR, VIR CELEBRARIME.

REIPUBLICÆ HARDEROVICENÆ VIRI CONSULARES AMPLISSIMI, GRAVISSIMI; QUIQUE GRAVISSIMIS A SECRETIS ES, VIR SPECTATISSIME.

DIVINARUM AC HUMANARUM SCIENTIARUM PROFESSORES, VIRI CELEBERRIMI, ERUDITI ORBIS LUMINA SPLENDIDISSIMA.

DIVINORUM ORACULORUM IN ECCLESIA HARDEROVICENA INTERPRETES FIDELISSIMI, FACUNDISSIMI.

QUARUMLIBET SCIENTIARUM ET ARTIUM DOCTORES ATQUE MAGISTRI, CONSULTISSIMI, EXPERTISSIMI, ACUTISSIMI.

GYMNASII VELAVICI MODERATORES
VIGILANTISSIMI.

PARANYMPHOI CARISSIMI, AMICI CON-
JUNCTISSIMI.

CUJUSLIBET DENIQUE LOCI, ORDINIS,
ATQUE DIGNITATIS AUDITORUM,
SIVE NATALIUM SPLENDORE, SIVE
HONORUM TITULIS, SIVE STUDIO-
RUM MERITIS INSIGNIUM, EXOPTA-
TISSIMA CONCIO.

VOS TANDEM GENEROSI JUVENES,
MUSIS SACRATA PECTORA, HACTE-
NUS COMMILITONES SUAVISSIMI,
EXOPTATISSIMI.

ORA-



ORATIO.

Hominum primos Adamum & Evam a SUMMO NUMINE perfectissimos fuisse creatos, Sacrae nobis testantur Paginae; ita ut aequae ad Mentem ac Corpus felicissimo fruerentur statu; Mens enim lucidissimis veritatis radiis continuo illuminata perfectam possidebat cognitionem, longaeque remoti erant omnes Animi tranquillitatem perturbantes affectus; summa in Corpore aderat sanitas, absolutissima omnium actionum integritas, neque mali ulla cupido. Eleganter hinc de eximio illo statu Poëta cecinit:

*Nullus erat dolor Mentis, non semina Morbi,
Pallida non facies, pestis, non venter aquarum
Turgidus, aut querulo squallebant Corpora morbo;
Ubera vaccarum trepidabant pecora metu;
Vipera non laedens, non fallax herba veneni;
Molli perpetuo flavebat campus arista;
Et duræ quercus sudabant roscida melle
Plus quam Saturnina. Regna.*

Utinam autem remansissent in felicissimâ vitæ conditione! ast, proh dolor! vix fructus beatitudinis gustaverant, quin jam jam ab ipsa privarentur, Diabolo enim plus quam Deo credentes turpiter lapsi fuerunt, factumque cum Deo fœdus inhoneste violarunt, eo effectum, ut ab omnibus donis, privilegiis & prærogativis, a SUMMO NUMINE benignissime largitis, in totum orbarentur.

O atra dies! O tristissimus Protoplastorum lapsus! O deploranda & nimis temeraria Præcepti Divini violatio! Tu mille pedisse-quas habes ærumnas, Hominibusque adeo funesta evadis, ut, dum antea Animus divina præditus erat cognitione, summaque tranquillitate fruebatur, nunc densissimis ignorantiae tenebris sit occæcatus, innumerisque Animi sedationem interpellantibus vexetur cruciatibus: ut, dum antea summa in Corpore aderat sanitas, nunc millenis ærumnis ac ægritudinibus, imo & ipsi pallidæ morti obnoxium evaserit. Non immerito hinc quidam Poëta miseram Humani Generis conditionem sequentibus depinxit versiculis:

Cor

*Cor nisi cura nihil, Caro nil nisi triste cadaver.
Nasci ægrotare est, Vivere sæpe mori.*

Imo & ipse Sacer testatur Codex: *Quod Homo de Muliere natus, brevi vivens tempore, multis repleatur miseriis.* Hinc & illud Democriti dictum: *Totus Homo ab ipso ortu Morbus est.*

Luctuosa itaque est fatalis nostra conditio, prima enim luminis aura vix fruimur, quin vitam cum morte commutare jam incipiamus, corpus enim inevitabili vitæ effectū continuo magis magisque semet ipsum destruens, innumeris morbis ansam præbet, iisdemque incuratis, inevitabili morti.

Non sufficit itaque A. O. O. H., ut sinistram tantummodo doleamus sortem, verum etiam necesse est, ut mala nostram ruinam minitantia, quantum fieri poterit, avertamus, ut ægritudines & morbos, Humanum corpus hostiliter invasuros, præveniamus, ut auxilia quæramus, quibus mediantibus eisdem jam natos tuto jucunde & cito curemus, radicitus extirpemus, aut, insanabiles si fuerint, palliemus; hoc nisi fiat, brevi de Humano Genere actum fore

Hypsearrior esse deberet, qui hoc videre non posset.

Hæc autem adeo exoptata auxilia Nobilis Machaonia Ars abunde suppeditat, hanc si perscrutamur, inexhaustum remediorum fontem in ipsa detegemus, infinitas insuper inveniemus recte medendi regulas, verasque remediis utendi Methodos, nec non morbos præveniendi scopo Prophylaxes, ut sic sanitatem tueamur nostram, eamque læsam restituamus, aut, ne in deterius ruat morbus, præveniamus, ut tuto, jucunde & cito quibuscvis medeamur afflictibus, Hominibusque pristinam vitæ restituamus integritatem.

O Nobilem itaque Medicinam! O Divinam Apollinis Artem, quarumvis ægritudinum, morborum, affectuum & ærumnarum Expultricem! O Sacram Anchoram! O amœnissimum Portum, ad quem, ut pallidæ mortis phalanges subterfugiamus, tutissime confugimus!

Quis itaque adeo vesanus esset, ut, per momentum licet, Nobilitatem Tuam, Præstantiam atque Necessitatem in dubium revocaret? Quis ad Te addiscendam noctes diesque impendere recusaret? Quis non omnia

nia tentaret, ut Te edoctus infelici Mortalium Generi succurrere posset? Quis non amabamus, ut ajunt, ulnis Te amplecteretur ut Ægros cum morte luctantes, fatoque jam jam succubituros ab Orci quasi faucibus revocare valeret? Quis non.....?

Sed quid opus, ut Te, infinitis insuper amœnitatibus delectabilem, ulterius commendem?

Ne autem credatis A. O. O. H., omnem Medicinam Humano Generi æque salutarem esse censendam; quam utilis enim, quam salubris, quam necessaria Humano Generi hæc sit censenda Scientia, si a peritis, Artemque bene edoctis excolitur Medicis, tam noxia, tam pestifera, tam perniciofa eadem hæce evadit Scientia, si ab imperitis & illotis tractetur manibus.

Utinam vero justissima dolendi non esset causa! quod his temporibus, quibus tanta lux nostræ affulsit Scientiæ, tot ignari, tot imperiti reperiantur homines, Medicinam exercentes, Medicorum nomina adoptantes, ita ut merito depravato huic seculo adaptari possit sequens Distichum:

*Fingit se Medicum quisquis Idiota, profanus,
Judeus, Monachus, Histrion, Tonfor, Anus.*

At vero, quod nomen illis tribuendum, antequam notam potius inurendam existimabimus; qui sola Urinæ inspectione, neglectis reliquis morborum Criteriis, quosvis morbos affectus detegi posse gloriantur, quodque pejus, ulla absque cognitione remedii, quod Aegro assumendum propinant, Praxin suam exercent.

Quum itaque hodie Solemnis est ille Dies, quo Publice verba facere cogitaveram, non inutile, neque injucundum fore putavi, si veris Dogmatibus superstructam a vanis Uroscoporum jactationibus vindicarem Medicinam, in examen scil: revocando quaestionem illam: *Utrum Uroscopus ex sola Urinæ inspectione Morbos quorumvis Aegrotantium rite detegere, iisque ex Arte mederi possit*; Nihilque ineptius, nihilque magis absonum hisce nugis excogitari posse demonstraturus.

Utinam autem concinno ordine rem pertractare valerem! Utinam aptus essem Vestros in consensum trahere Animos! Ast cum considero ingenii mei tenuitatem; cum perpendo parcam admodum & vix nominandam Doctrinæ supellectilem; cum animo volvo Publice Dicendi imperitiam; cum deni-

niſque oculos verto in tantam Doctorem Co-
ronam, nil niſi docta proferre & audire ſo-
litam, Animus me derelinquit, Pedes vacil-
lant, Cor palpitat, Hypochondria conſtrin-
guntur, Lingua tremet, totumque Corpus Pa-
nico Terrore concutitur, duramque Publice
Dicendi Provinciam imbecillibus haud impo-
ſuiſſem humeris, niſi Veſtra Benevolentia
fretus, eamque hodie jam bis expertus A.
O. O. H. tanta moliri auſus fuiſſem. Be-
nevolos itaque animos, ac faciles mihi præ-
beatis aures, Juvenemque Oratorem Veſtra
proſequamini Benevolentia, oro, precor.

Humor inutilis, excrementitiuſ, in reni-
bus a ſanguine ſecretuſ, per ureteres ad ve-
ſicam delatuſ, ex eadem per urethram ex
corpore expulſuſ, Medicis Urina dicitur.

Urina hæc ſanitatiſ tempore excreta colo-
rem habet amœne citrinuſ, cum lævi albi-
cante in medio natante nubecula, ſimulque
aliqualem ingratuſ ſpirat odorem.

In morbiſ autem varia urinæ contingit
mutatio, ſive ratione Quantitatiſ, ſive
Qualitatiſ, ſive Sedimenti, ſive Eorum,
quæ urinæ permifcentur.

Hoc quum obſervavere Veteres, ſedulo in
id

id incubuerunt, ut, ex variis urinæ inductionibus, varias morbosas in corpore factas detegerent mutationes, ut sic in posterum, hiſce notatis, morborum ſigna ex urina petere poſſent. Hinc orta eſt urinæ in morbis inſpectio, atque ſigna ex eadem deprompta, ceteris juncta, tanquam certiffima fuere habita.

Optimum licet illud fuerit Veterum inſtitutum, anſam tamen dedit peſſimis in Arte erroribus, quæſtuoſi enim homines, nobili Veterum inſtituto abutentes, ex ſola urina, omiſſis ceteris ſignis, quaſvis morborum cauſas detegi poſſe præ ſe tulerunt, ſicque nata eſt, ſummo cum Hominum damno, peſſimo cum Artis detrimento, infamis Uromantia.

O peſſimus rerum optimarum abuſus! O nefanda avaritia, qualia tui amoris cauſa ab hominibus inhoneſta, qualia impia perperantur ſcelera! Videamus autem, videamus, utrum decantata illa Uromantia tam certa ſit, quam inepte multi ſibi aliisque perſuadere cupiunt. Videamus, inquam, utrum quævis urinæ inducta mutatio certum & unicum in corpore naſcendum vel natum præſagiat morbum. Sane nullo modo.

De

De Quantitate lis esse nequit, quum non omnis, quæ per Nycthemeram excernitur Urina, offertur Uroscopis, verum aliqualis tantummodo portio, quæ eorundem satisfacit vaticiniis.

Ad Qualitatem vero magis attendunt, illicque tanquam firmæ basi magnam Uromantiæ partem superstruunt Uroscopi.

Videamus autem, utrumne basin illam subvertendo totius ædificii ruinam procurare possimus. Excernat itaque, ut cum colore incipiam, V. G. quis urinam pellucidam, subviridescentem, ullo absque sedimento. Quid ex hoc conspecto colore concludet Uroscopus? Si omni privatus fuerit, uti plurimi sunt, Medicinæ peritia, nihil; sin aliquali ejus cognitione instructus, forsan judicabit, falsum acrem tali in Ægro prædominare humorem, adeoque illum Muriatica laborare Acrimonia. Verum licet hoc esse possit, non tamen sufficiens morbi habetur cognitio; uti enim per totam humorum massam dispersus hæere potest humor, sic & eodem modo diversa metastasi ad varias corporis partes deferri poterit, varii itaque particulares morbi, iique satis graves, & periculosi inde causabuntur, Si

Si enim ad Caput deferatur acris illa materia, pessima inde ac intolerabilis produetur Cephalalgia, nascetur Vertigo, ipsa Apoplexia, imo Convulsiones brevi lethales.

In Collo si præcipue suam ludit tragicædiam, molestissima orietur Angina, dolorifica Tussis, ingrata Raucedo.

In Thorace copiose præsens causabitur Asthma, Dyspnœam, Anxietatem, Suffocationem, imo ipsam pulmonalem Phthisin.

Ad Abdomen si magna copia confluerit humor, enormes Colici inde producentur Dolores, Tormina vix toleranda, Borborygmi, Flatus, Alvus liquida & constipata, Dysenteria; in viis Urinæ Ischuria, Stranguria, Dysuria, molestissimus utriusque Tenesmus.

In toto Corpore oberrante materia, vagi producentur Dolores, summa totius Corporis Emaciatio, & lenta Hæctica Febris.

Ad Corporis Superficiem delata, Pustulas, Maculas, Herpetes, Excoriationes, Ulcera, imo infinita alia producet mala.

An nunc ex sola urina valebit Uroscopus discernere Partem præ ceteris affectam, in qua maxime hæc acris materia suam ludit

tra-

tragœdiam? Hoc sane nemo facile credet; licet enim in urina revera talia adessent Criteria, quanta requireretur Memoria ad conservanda illa Criteria! Quanta Attentio ad ea dignoscenda! Longe hoc Humanum superat Intellectum.

Objiciet forsan Quis, non necessariam esse illius Metastaseos cognitionem, solamque hujus materiæ in corpore novisse præsentiam sat esse Medenti. Respondeo minime; quicumque enim solummodo morbos statim recensitos attenta contemplatur mente, videbit ilico, non eadem hic locum habere posse Medicamina, differre autem illa quam maxime debere pro varia Parte Obsessa, interna nempe vel externa, magis vel minus principe, superiore vel inferiore. Sic magnum discrimen erit, utrum Caput afficiatur, utrum vero Brachium. In priore enim casu, si periculosa producantur symptomata, istius materiæ derivationem ad aliam partem principem causari, ipsiusque evacuationem promoveri conabimur, vesicatoria scilicet: cruribus atque pedibus, nec non cervici applicabimus, sternutatoria, masticatoria præscribimus acria, purgantia propinabimus valida,

ut

ut iis omnibus mediantibus humori acri e Capite procuretur exitus; dum Brachio inde male affecto longe minorem remediorum adhibemus pompam, eaque alia iterum præscribimus forma, inungimus nempe illud remedio stimulante, nervino, anodyno, non præscribemus hic purgantia, verum potius diaphoresin sollicitabimus.

Sed non tantum differre debent remedia pro Parte Obsessa, verum etiam pro Periculo, in quo ex læsa Partis Functione versatur Aeger, sic V. G. si tanta copia aeris hujus materiæ intra Pulmones delata fuerit, ut inde lethalem metuamus suffocationem, venam secabimus, eamque largam, ut minuendo humorum copiam & impetum symptomatum levamen adferamus Aegro, Nobis que aptum materiæ expellendæ tempus & occasionem suppeditemus. Maxime ceterum hoc in morbo nocet venæ sectio, præterquam enim, quod ea mediante non valeamus omnem acrem ex corpore expellere humorem, insigniter insuper vitalem minui-
mus motum, spontaneam itaque promove-
mus humorum degenerationem, ipsamque proin morbi causam fovemus. Ex binis au-
tem

tem unum erat eligendum malum, quod itaque minus nocivum, peiori præferendum, suffocato enim Aegro, frustra esset omnis cura.

Quum itaque ex solo urinæ colore Uroscopi locum præ ceteris affectum detegere nequeunt, nec, ad quem primarius curandi scopus sit dirigendus, indicare morbum, nullo modo requisita quoque præscribere possunt auxilia.

Ne autem hæc nimis temeraria videantur dicta; urina enim flavissimo colore tincta certissimum Icteri præsentis exhibet signum, si scil: linteum ipsi immersum eodem tingatur colore, acceptumque colorem aqua elui haud patiatur; verum quidem est, illum hoc in casu (si tantam habuerit Medicinæ peritiam) locum affectum detegere posse, Icterus enim numquam nisi ex hepate morbose affecto suam originem trahit; sed quid hoc novisse prodest? Quomodo suam instituet curam? Unicam enim Icterus non agnoscit causam, verum valde variantem, imo oppositam, Calculus, Inflammatio, Spasmus, Hepatis Obstructio, similiaque Icterum producere apta sunt. Quid itaque

aget? An diligenter examinando urinam, causam quoque detegere potest? Me Hercule! tanta in urina recondi myſteria, & neminem præter Uroſcopos ea detegere poſſe, vehementer dubito.

Sed quanto ludibrio, ad colorem urinæ attendens, ſe non exponeret Uroſcopus, ſi quis, ipſius capacitatem experiundi cupidus, largo aquæ epoto hauſtu, ſanam, ſed tenuem & fere excolorem offerret urinam, illeque talem non tantum ægrum, verum ſpeciatiim Mobilitate, Paſſione Hyſterica, vel Hypochondriaca laborare diceret, quod facile contingere poſſet, in morbis enim his nominatis, & ab hominibus ſanis, poſt copioſum potum aquoſum omnino ſimilis excernitur urina.

Præterea, quot non ſunt res, ſive medicamenta, ſive alimenta, quæ corpori ingeſta urinæ colorem conciliant variū, quorum ignarus Uroſcopus, ſuo cum dāmno, ſuæ cum artis detrimento, turpiſſime hallucinari poſſet.

Nihil itaque ex ſolis urinæ Coloribus iudicandum.

Neque Odoris unica conſideratio majorem

rem adferet utilitatem. Quanta enim morborum caterva, in quibus putidus V. G. odor occurrit? In omnibus scilicet. Acutis, five Inflammatoriis, five Erysipelatosis, in putredinem & colliquationem transeuntibus. Observatur etiam in Biliosis Putridis Autumnales, quorum cura tamen maxime differt, In Prioribus enim remedia sunt præscribenda antiseptica leniter stimulantia & cardiaca, resolventia vel adstringentia, prout humorum adest tenuitas vel crassitudo. In Posterioribus autem eadem quidem est observanda differentia, remedia vero debent esse refrigerantia, motum minuentia, prioribus itaque contraria. Observatur etiam sæpissime in calculosis affectibus, dirissimaque Ischuria vesicali, lotio diu in vesica retento, stagnatione corrupto, pessimamque nullo modo dignoscendam contrahente mephitim.

Quomodo jam, quæso? Uroscopus unam ab alia dignoscet urina? Omnibus in casibus intolerabilis idemque prorsus adest foetor, sæpe difficultatibus gravibus involutus, se extricare haud poterit.

Uti nunc neque Color neque Odor quid certi in detegendis morbis exhibent, sic neque

Consistentia quid luminis affundet Urbscoporum jactationibus. Rei veritatem probant dicta de colore, vidimus enim ibidem, urinam tenuem, excolorem, æque observari in homine sano, imo robusto, post copiosum assumptum potum, quam in Hystericis tenellis fœminis. Veritatem quoque ostendit urina cruda, crassa, quæ observatur tam in debilitata ventriculi & intestinorum actione, cibos non bene subigentium, non bene coquentium, quam in debilitata pulmonum vasorumque actione, chylum allatum non bene præparantium, vel in bonum sanguinem convertentium. Quot autem sunt causæ, quæ ansam dare possunt ventriculi & intestinorum debilitati? Nonne amissus nervorum, ad partes illas videntium, vigor, humorum saponaceorum defectus, eorundemque depravata qualitas, solidarum partium inertia & languor, immodicus cibi potusque usus, & quæ non aliæ? Quot pulmonum vasorumque debilitati? Idem ille amissus nervorum vigor, eadem illa solidarum inertia & languor, spasmi, tumores, excrecentiæ, obstructions, indurationes partium quarundam, in pulmone contentarum, vel extra eundem

ja-

jacentium. Quum vero cruditās hęc, pro varia producente causa, diversam medelam postulat, quumque constat, in urina variam illam non indicari causam, multo minus ipsius remedium, sponte patet, Uroscopum ex sola urinæ Consistentia paucos posse expectare usus.

Primum jam, ut puto, subvertimus Uromantiæ Fundamentum, nunc secundam ipsius Basin, non minus firmam, demoliri debemus, ut sic sensim magis magisque vacillans Uromantiæ Aedificium tandem penitus prosteratur. Oculos nempe conjiciamus in Sedimentum, ad fundum vasis urinam continentis collectum, & videamus, quot, quantaque ex diligente ipsius contemplatione in Uroscopum redundant bona, paucissima sane. Idem enim in diversis morbis occurrens varium omnino præfagium exhibet; nam sedimentum album, æquale, leve, copiosum, in morbis Acutis, benigne non resolutis, sed critica evacuatione materiam morbosam ex corpore expellentibus, optimum præbet signum: indicat enim vasa distenta & infarcta depleri, ac relaxari, humores concretos incipere solvi, motumque prius

insigniter auctum imminui, adeoque egregium & saluberrimum ostendit Naturæ conamen.

Paucum contra si esset, magnam materiæ morbosæ quantitatem in corpore retineri, atque imperfectam fieri Crisin indicaret, vel motum adeo esse validum, ut mediante critica evacuatione morbus terminari nequeat, adeoque ipsius transitum in purulentiam, vel putredinem, esse metuendum, periculosam itaque imo sæpe lethalem exhibet Ægri conditionem.

In Chronicis vero, licet supra indicatas habuerit qualitates, & copiosum prodierit sedimentum, pessimum exhibet signum, indicat enim insignem in corpore latitare materiæ morbosæ copiam, generalem humorum massam corruptione esse infectam, adeoque longævitatē & difficillimam morbi curam.

Paucum contra si prodeat cum virium incremento, sanitatis recuperationem instantem esse denunciat.

Copiosum quoque sedimentum, licet purulentum, si observetur in Acutis in purulentiam conversis, saluberrimum censendum erit, indicat enim, vires vitales sat esse valentes, ut purulentam illam materiam ad

Or-

Organa urinæ derivare, eorundemque ope a sanguine separare possint, ita ut spes supersit, fore, ut brevi omnis purulenta materia expellatur, Aegerque pristinam recuperet sanitatem.

Idem autem illud contingens in Phthificis, ingentem puris scaturiginem, magnam pulmonis partem esse suppuratam, insigniter deficere patique debere humorum præparationem, summam totius corporis emaciationem, ingentem virium jacturam, morbumque insuperabilem ac lethalem esse declarabit.

Quomodo autem, quæso? Uroscopus jam dignoscet, utrum urinam, in qua copiosum est sedimentum, malam vel bonam pronunciare debeat? Quonam criterio pus hominis, morbo Acuto suppurato laborantis, dignoscet a pure Phthificorum nondum corrupto? Quonam criterio sedimentum saluberrimum in principio Acutorum prodeuns distinguet ab illo quorundam Chronicorum? Nullo sane, verum aqua hic ipsi hærebit.

Uti vero sedimenti Quantitas nihil ad vaticinandum confert, sic nec ipsius Qualitas doceat hoc morbi, in quibus idem non raro occurrit sedimentum, prorsus distincti; al-

bum enim sedimentum, uti vidimus, in principio Acutorum, cum virium incremento, morbiq̃ue levamine prodeuns, optimum Naturæ conamen exhibet, Ægrique salutem denunciat; in Catharroſis vero, aliisque Chronicis malis, sæpius magnam acris materiæ copiam in corpore hospitantem denotare solet, malumque præſagium præbet.

Eodem modo cum ceteris ſedimenti coloribus res ſeſe habet, exhibent enim, pro varia Ægri conditione & ſtatu, ſaluberrima Naturæ conamina, vel ipſam minitantur mortem.

Ad Qualitatem porro ſedimenti, ſive Generalẽ, ſive Specialem, ſi oculos convertamus, incerta ſemper inde facta manebit indicatio; ſic V. G. æquale ſedimentum in genere quidem bonum coctionis præbet ſignum, & morbi levamen, tum ſcilicet, ſi tale ſedimentum obſervetur in morbis coctione indigentibus, aut in quibus materia cocta per urinam commode ejicitur, ſic conveniet in morbis Acutis, in Pectoris morbis, aliisque. In morbis vero Chronicis, Catharro, Acrimonia Myriatica, Nitroſa, ſimilibuſque, materiam ſuam cum levamine non ita per urinæ vias expellentibus, bonum non
ex-

exhibebit indicium, non ita *Æger* inde levabitur, verum multo vehementius favire incipiet aliquando morbosa materia.

Sed quæstio jam iterum est, quomodo discernere possit *Uroscopus* unum ab altero sedimento, quum una eademque fronte sese offerunt? Sane nullo modo se extricare valens scientiæ suæ infirmitatem agnoscere tenebitur.

Huc usque de binis præcipuis *Uromantia* egimus fundamentis, de Qualitate nempe *Urinæ*, ejusque Sedimento, brevibus adhuc videamus de illis, quæ *urinæ* non sunt naturalia, sed morbose ipsi permiscentur. Inter hæc occurrit sæpissime Sanguis, hunc quum conspexerint *Uroscopi*, periculosum denuntiabunt *Ægri* statum, eumque *Mictu Cruento* laborare dicent. Sed hoc ipsi norunt homines, *Uroscopi*! ex hoc vestro dicto non meliora sapiunt; nisi quod morbi periculum jam forsitan magis timeant. Sed undenam vestrum periculi criterium? Quænam est morbi causa? hanc ignoratis, & tamen de *Ægri* statu judicatis; O ignari! ut cæci de coloribus, sic vos de morbis judicatis. Et quomodo opem feretis *Ægris Mictu Cruento* labo-

rantibus? Alia enim est instituenda cura, si oriatur ex laxatis, & vi laxitatis ampliatis renalibus tubulis ipsos rubros sanguinis globulos transmittentibus; Alia in eodem ex abusu Diureticorum vel Emmenagogorum orta; Alia in eodem, ex sanguinis velocitate & impetu ad organa uropoietica auctis, nato; Alia in eodem ex calculo, in viis his hospitante, aspredine sua vasa dilacerante, producto; Alia in humorum Attenuatione, sive Chronica, sive Acuta. Horum omnium ignari estis, imo, licet has cognosceretis causas, attamen illas, quum ex urina detegere haud potestis, tollere inepti estis.

Ad morbos solidarum partium ulterius si progrediamur, respicio praesertim Chirurgicos; quonam criterio unquam dignoscetis hominem laborare Schirrho, Lupia, Struma, Ateromate, Steatomate, quomodo Ossa Fracta vel Luxata, Vulnera, Contusiones, Ulcera, Pustulas, Maculas, Tubercula detegetis? Non enim sanguini materiam communicant, quæ inde ope renum discerni poterit, omnibusque illis in morbis fanissimæ similis urina excernitur.

Præterea si perpendamus, urinam insigni-
ter

ter mutari abusu Rerum Sex non Naturalium, imo & ipso victus ac remediorum usu, quidni & in diverso morbi, imo diei tempore excreta tantum differre potest, ut, si ex urina esset iudicandum, longe alium crederemus adesse morbum.

Huc usque, ni fallor, A. O. O. H., satis ex rigidissimo urinæ examine constitit, illam nullatenus sufficere solam morborum causis detegendis, sed fallacia esse illa, quæ de sua scientia tam inopte garriunt Uroscopi. Veritatem illam millenis insuper specialibus comprobare possem exemplis, ex quibus evidenter pateret, nihil urinæ inspectionem collaturam ad curam felici cum successu instituentiam, sed omnes adhibendas esse ingenii dotes, ut, quid agere debeamus, prudenter concludamus. Unum itaque pro omnibus sufficiat exemplum: Laboret V. G. quis Podagra, atroces in pede vel manu patiatur dolores, sed ilico liberetur ab iisdem, partesque detumescant, ingentes patiatur in thorace loco doloris anxietates; quid genuinus Dogmaticus inde concludet Medicus? Nonne periculosam materiæ podagricæ thoracem versus esse factam metastasin, summum

num adesse vitæ discrimen, & ancipitem Ægri conditionem judicabit? Prudenter itaque secum reputabit, quid in ancipite hoc casu sit agendum, indicantia contraindicantibus opponet, amborumque valorem ponderabit, &, quod præponderabit, adhibebit; venam itaque secabit, licet Podagræ nocivam, ut, ea mediante, forsan Ægri vita prolongetur, & apta nascatur occasio ingerendi remedia; propinabit Diaphoreticum, non tamen multum stimulare; partes detumefactas laxari, simulque stimulari curabit, tentaturus, utrum hisce remediis morbosa materia priora loca versus derivari possit. Omnia autem hæc celerrima mentis determinatione, summa tamen cum prudentia peragi debent; requiritur itaque judicium perspicax ac promptum ad, quid faciendum sit in casu hoc ancipite, bene ponderandum & dignoscendum; si vero tanta hic requiritur prudentia, tanta judicii promptitudo & perspicacia in Medico Ægrum præsentem habente, omnia symptomata morbi observante, atque ad eorum incrementum aut decrementum probe attendente, quantum tum requireretur in homine, qui ex sola urina hæc omnia dignoscere de-

debet, ingenium! Quanta perspicacia! Sed quomodo, quæso? Uroscopus, qui ne quidem noscit, Ægrum Podagra laborasse, unquam materiæ podagricæ metastasin thoracem versus suspicabitur? Nisi quis adeo vesanus esset, ut crederet, præteriti æque ac præsentis morbi criteria in urina contineri singulaque iterum distincta, ita ut, quid præsens, quid præteritum, quid futurum sit, certo singulis characteristico signo dignoscere possit Uroscopus. Quis sana mente præditus unquam his nugis fidem tribueret?

Sed objicient forsan; Licet urina ad nostros sensus in diversis morbis eadem appareat, se tamen dignoscere posse characteristicum illud signum, quo unus ab alio distinguitur morbo, in quacunque cujusvis morbi urina, etiamsi aliis heterogeniis obvolutum, reperiundum.

Responsio autem ad talem nimis frigidam objectionem est in promptu: Largiamur modo & concedamus ipsis pro tempore, signa cujusvis morbi, ejusque causæ, in urina esse reperiunda, non tamen inde sequeretur, ea ab Uroscopis detegi posse, minime Gentium; ut enim signa in urina certum Ægri sta-
tum

tum indicantia dignoscantur, in antecessum novisse necesse est quævis non tantum morborum nomina, verumetiam causas quascunque morbos producere aptas, effectus, qui in singulis observantur morbis, mutationes denique, quas quidam morbi subeunt per omnia eorum stadia, curam tandem omnibus horum morborum singularibus causis adaptatam & selecta hunc in finem requisita remedia, eorumque bonam pro diversa Ægri ætate, constitutione, temperamento, idiosyncrasia, similibusque aliis, administrationem, adeoque requiritur intima & perfecta Medicinæ cognitio, ut signa in urina certum morbum indicantia, dignosci possint.

Quis autem adeo vesanus esset, ut crederet, hæc omnia sibi perspecta habere Uroscopos? Credat hoc Judæus Apella, ego non. Non enim tam facile addiscuntur hæc omnia, neque tam brevi temporis spatio, quam ab ipsis addiscitur Uromantia. Præterea, si ad ipsas attendamus Personas, Uromantiam exercentes, absurditas rei sua sponte patet; Sutores enim, Barbitonfores, Texores, Histriones, Laniones, similisque farraginis homines ordinario esse solent, qui, vel præ pigritia

Fa-

fabricas suas deferentes, vel fama & bonis privati, in Uromantia exercenda inanem, Herostrati instar, famam sibi comparare cupiunt.

Sed præterea, undenam didicissent illam ex urina vaticinandi artem? An eadem ipsis est innata? An verò per Experientiam, aut alium quemcunque modum sibi comparaverunt nobilem illam scientiam?

Prioris absurditas sponte patet. Posterioris vero fallitas demonstratu haud difficilis est; si enim per Experientiam didicissent, quot tum non miseri, in quibus id experiri deberent, eorum ignorantiae culpa supremum obiissent diem! Prima enim vice incertum præscribere debuere remedium, quod æque malum ac bonum potuit habere effectum; neque altera vice certius præscribent remedium, similis enim, uti vidimus, in oppositis morbis excreta urina, semper incertum, & periculosum reddet eorundem experimentum. Præterea, licet per totum vitæ decursum suam exercuissent artem, quotidie tamen novi ipsis occurrerent casus, quorum similes nunquam observaverant antea, quorumque nullam proin cognitionem per Ex-

pe-

perientiam hæcenus adepti erant, una enim hominis ætas omnibus experiendis non par est; periculosum itaque & incertum semper maneret eorum vaticinium; per Experientiam ergo Uromantiam addiscere non potuerunt.

Neque aliunde ipsius cognitionem haurire valuerunt; non enim publicas adierunt Academias, imo licet illas adiissent, non tamen ibidem ab omnibus Eruditis damnatam docti fuissent Uromantiam. Neque tales etiam existunt libri, qui certa & indubitata hujus artis fundamenta continentes, ipsis viam præmonstrare possunt.

Unde ergo tam stupendam nacti sunt sapientiam? Forsitan DEUS ipsis miranda talia revelavit arcana? Ne jocum me facere putetis, Auditores, reperiuntur sane tales profani, qui, vanam suam ex urina prognosticandi artem DIVINO instinctu ipsis esse revelatam, dicere haud verentur. O temeraria, impia & nefanda assertio!

Si enim DIVINO instinctu artem suam edocti essent, procul omni dubio vitæ ac morum integritate aliis antecellerent, contrarium autem docet experientia, nihil enim

nim minus quam pietas, quam religio, quam morum integritas Uroscoporum cura est, e contra quam plurimum pessimæ Atheorum Sectæ addicti, vitam plane irreligiosam, imo bestialem agere solent.

Præterea, nunquam in fundendis suis oraculis decipi possent, sed semper eventus eorum comprobaret vaticinia, contrarium vero millenis Miserorum comprobari posset querimoniis, qui, & ratione solutæ pecuniæ, & mali promissorum eventus, ab ipsis decepti fuere.

Præterquam, quod hodie, dum Evangelium ipsique superstructa Fides & Religio, per Miracula in principio confirmanda, nunc firmiter sunt stabilita, tales DIVINÆ Revelationes jam dudum aboleverunt.

Sed forsitan aliud iterum habebunt effugium, Diabolum ipsos ex urina vaticinandi artem docuisse, dicentes; ast vehementer dubito, utrum Diabolus, cujus potestas, post Christi mortem & in cruce Triumphum, multum est refrænata, talia efficere possit. Verum licet & his præstandis idoneus censeretur, nonne absurdum & contradictorium esset, Ens illud maledictum, Tyrannum toti

C

Hu-

Humano Generi quam maxime infestum; Hostem juratum & implacabilem, simul concipere bonum, amicum & in nostram salutem quam maxime proclivem, sane crediderim potius, eum, si posset, totalem Humani Genēis procuraturum interitum, quam quod quicquam boni in ejusdem salutem moliretur.

Ex supra indicatis itaque, ni fallor, clarissime constat, Uroscopos nequaquam possidere sive Naturalem, sive Supranaturalem Scientiam, qua mediante ex sola urina Ægrotantium morbos detegere possunt.

Hæc si vera, uti verissima sunt, multi Vestrum A. O. O. H., forsan mirabuntur: Unde tanta eorum fama; Unde tam mirabilia, quæ ab ipsis narrantur elocuta vaticinia; Undenam & contingat, ut morbos, pro inexpugnabilibus habitos, feliciter aliquando curent.

Ad triplicem itaque illam quæstionem singulatim respondebo, & quidem primo ad illam quæstionem; Undenam nempe tantam adepti fuerint famam Uroscopi: sane non aliunde, quam quod pessimi illi homines, Uromantiæ exercendæ operam navantes, ipso

fos adeuntes, eorumque opem postulantes, ex plebe præsertim natos, sua argutia decipere facile potuerint, multum de sua sapientia ratiocinando, magnam verborum vix intelligibilium seriem de Ægri statu & conditione explodendo, hysteron proteron inter se invicem permiscendo: unde ignarum vulgus, corticibus inhærere, nucleumque intactum relinquere consuetum, stupendam Uroscopi sapientiam miratum, mox ipsi solemnes, Apollinis instar, honores conferre, ejusque summam ingenii aciem, & omnium caput superantem doctrinam ubivis extollere solet, unde brevi per omnem urbem divagatur fama Viri tanta eruditione præditi, ut quovis ibidem loci degentes Medicos longissime superet. Non parum & ad famam ejus amplificandam confert, si homines ex meliore stirpe progeniti, ignorantis vulgi clamori fidem habentes, ipsi tali utantur Uroscopo, præsertim, si forte fortuna morbum, quo Æger laborat, conjiciendo detexerit, vel inter vaticinandum (hoc enim sufficit) quid huic morbo simile recensuerit, tunc mox fama ejus adeo celebratur, ut nisi humanum possideret corpus, Deum aliquem

e Coelo missum putarent homines.

Obstupefcite, Auditores, ignarus Barbiton-
for momento temporis in Apollinem conver-
sus, O mira Metamorphosis!

Secundam quod attinet quæstionem: Unde
tam mirabilia ab ipsis elocuta vaticinia suam
originem trahant, nunc indicabo, ut autem
hoc eo felicius procedat, insequamur quadra-
tum V. G. Rusticum, Divinum illud Ora-
culum consulturum. Mox, quum intravit
cubiculum, ubi sedem suam tenet Uroscop-
pus, eum rusticorum more absque ulla ver-
borum pompa salutat, Ægrotique tradit uri-
nam, supplexque Vatis precatur auxilium.
Uroscopus, fronte setosa, allevatis superciliis
sub urinæ inspectione sæpius caput huc illuc
agitat, & non raro ex imo suspirat, utrum
quid hisce gesticationibus ex rustico elicere
possit visurus, quod etiam contingit sæpius,
rustico enim, hisce vilis, satis abunde con-
stat de impostoris incomparabili doctrina,
unde, antea licet statuæ instar immobilis ac
mutus, nunc hoc illudve ipsi excidit verbu-
lum, quod Uroscopo mox occasionem lo-
quendi exhibet, recensere itaque varios, li-
cet toto cœlo discrepantes, incipit morbos,
il-

illudque symptoma, quod Rustici ore imprudenter excidit, ultimo recenset loco; mox Rusticus, fulmine quasi ictus, abruptis fatur verbis, in omnibus verum fuisse locutum Uroscopum, atque plenarie nunc summæ ipsius eruditionis persuasus, lubenter ipsi debitam solvit pecuniam, domumque rediens jactatorem ad cælum laudibus effert, eumque verum Prophetam esse denunciat, mirati omnes undiquaque divulgant, nugasque illas tanquam vera deprædicant vaticinia.

Alii autem Uroscopi alia iterum excogitarunt artificia, quibus homines decipere solent; vel enim ipsi colloquium ineunt cum iis, qui urinam ipsis examinandam offerunt, eosque sinistris quæstionibus capere tentant, V. G. ut sexum Ægrotantis detegant, solummodo quærunt, quonam tempore urinam excreverit Patiens; Rusticus ex hac quæstione nil mali suspicans, sexumque Ægrotantis recondere nesciens, illum vel illam hoc illo tempore excrevisse urinam respondet; ex quo responso statim sexus innotescit impostori; vel alii aliis utuntur fraudatoribus, qui ex hominibus, urinam adferentibus, omnia de Ægri statu expiscantur, interea temporis

dum absens vel domi non esse simulatur Uroscopus, dum tamen postea omnia ipsi vel narrantur vel ipse est omnium verborum testis auritus, licet occultus. Quum domum jam venisse dicitur, intrat cubiculum, urinam ipsi oblata quasi summa mentis acie examinat, omniaque audita vel narrata summa cum magnificentia eloquitur verba; attonitus rusticus, verba tam vera tam certa ab Uroscopo proferri, Divinum in ipso habitare Spiritum facile credit; O sancta Rusticorum simplicitas!

Neque & hic eorum fallaciæ finis est; nam et alios habent Fraudatores Ægrorum lectos visitantes, omnia de morbo Uroscopo sufficientia observantes, illique fideliter communicantes, simulque urinam Uroscopo examinandam offerri curantes, sicque, ut in præcedente casu, ex sola urina vaticinari creduntur.

Hisce artificiis utuntur Tyrones; qui vero in arte jam magis sunt versati, aliam adhibere solent methodum, illi enim non lubenter recensent talia, de quibus Æger nunquam conquestus est, ideoque in generalibus solummodo versantur terminis, & nunquam Ægri morbum vero designant nomine, sed V.
G.

G. ajunt: Viscera esse obstructa; ventriculum non coquere cibos, alimenta converti in aquam vel pituitam, Vasa lactea esse obstructa, hepar esse combustum, acidum & acrimonias prædominare in sanguine, sanguinem pituita esse infectum, & absque spiritibus, ipsiusque fermentationes & effervescentias esse alienatas, abscondita in corpore latere mala, & partes internas vel viscera esse inflammata, suppurata vel sphacelata, & quæ ejusmodi farraginis alia sunt, sicque semper, hisce generalibus proponendis, hominibus oracula illa audientibus, magnas suæ capacitatis & eruditionis ideas imprimunt, sibi que illibatam conservant famam.

Imo infinitis aliis modis decipiunt homines, quos si recenserem omnes, ne quidem dies sufficeret, in genere hoc certum, & instar axiomatis tutissime statui potest: Quo Quis fallendi magis peritus, eo melior est Uroscopus.

Objiciat forsân quis Vestrûm A. O. O. H., Uroscopos interdum dare responsa tam vera, tam adaptata Ægri morbo, ut ne Delphicus Apollo quidem id emendare valeret, absque quod ullam extraneam de morbo cognitio-

nem acquirere potuerint. Sane, si hoc procederet, ipsa vera esset Uromantia, hæcque res est, de qua nostra versatur quæstio, & quod absolute falsum esse ex antea dictis constare autumo. Si veritatis plane persuasi esse cupiatis, Auditores, cum urina Ægri manifesto & omnibus noto morbo laborantis adeatis Uroscopum, nihil dicatis, nullo modo ad Uroscopi facta vel dicta naturalem faciei mutetis formam, & Uroscopum vel alios vobiscum confabulari volentes, ad urinam relegetis; tum miro modo mutatam videbitis scænam, sudoribus diffluxurum præ anxietate Impostorem, nihilque nisi inconcinna quædam absque sano sensu verba prolaturum, Expertus Vobis Auctor sum.

Expertus inquam, nuper enim in hac Urbe (cujus historiæ nemo Vestrum, ut puto, ignarus est) mihi res cum tali jactatore fuit, qui quosvis morbos ex sola urina se detegere posse coram omnibus exclamabat; quam facile autem erat ipsum propriis dictis inscitiae suæ manifestissima monstrare indicia, quam facile erat impudentem ipsius garrulitatem in altum convertere silentium, ita ut ne verbulum proferre auderet aut posset.

Data

Data jam ad binas quæstiones responsione, tertia adhuc restat: Unde nempe fiat, ut aliquando morborum affectibus, licet obstinatissimis, opem ferant Uroscopi. Considerate mecum, quæso, Auditores, quod, si aliqualem habuerint, licet exiguam Medicinæ peritiam, & hunc illumve propriis vel aliorum argutiis detexerint morbum, ipsi tum quidem aliquando mederi possint, imo & obstinatis casibus, non enim Ægri vitam periclitari timentes heroica & validissime operantia præscribunt medicamina, eo effectum, ut in quibusdam, in quibus tantum virium superest, ut eorum effectum perferre possint, saluberrimum sortiantur effectum; & revera hoc locum habere potest quibusdam in casibus, pertinacissimis scilicet: Viscerum obstructionibus, aliisque Chronicis malis; multi vero his perferendis inepti, prohi dolor! animam ante exoptatum remediorum effectum jam expirarunt.

Præterea omni morbi cognitione licet destituti fuerint, aliquoties tamen evenire debet, ut felicem in curando sortiantur effectum, unum idemque enim est, quod ordinario præscribunt remedium; plures autem existunt morbi in quibus idem usu venit

remedium, adeoque, quum omnis generis Ægri ipsos adeunt, non mirandum est, illos quoque Ægros aliquando curasse, licet illud eorum sapientiæ aut ex urina vaticinandi scientiæ non sit attribuendum.

Denique, si his addamus, quod sponte Natura morbum sæpe solvat, vel & alius superveniens morbus prioris remedium esse possit, uti suo tempore jam novit Hippocrates, facile liquet, cur quibusdam morboſis affectibus nonnunquam medeantur Uroscopi.

Ex his itaque omnibus A. O. O. H., nisi me omnia fallant, satis superque constat omnia Uroscoporum vaticinia, tot licet encomiis deprædicata, non nisi nugacia, & a veritatistramite quam maxime aberrantia esse censenda, imo absurda & impia.

Dolendum itaque summopere est, multos reperiri homines, licet e meliore stirpe progenitos, (ignobilem enim & ignorantem non curamus plebem) attamen fidem his ineptiis tribuere haud dubitantes, dum potius optandum esset, ut, omnem ipsis dene-gando fidem, & Uromantiam, & ipsius cultores Uroscopos Patria exulare cogerent.

Quod autem magis dolendum, reperiuntur
tur

tur nonnunquam Medici, qui, ut hominibus placeant, aliquando tales vanas amplectuntur ineptias. O animi humiles, Medicorum nomine indigni estis! Quocumque enim modo contemplantur Uroscopi, vel Fures et saccularii, vel Homicidæ sunt habendi. Si enim præscribunt remedia, quæ nec nocere nec prodesse possunt, sunt fures & saccularii, promittunt enim hominibus usu suorum remediorum salutem, dum de eorum inertia sunt convicti; si heroica præscribant medicamina, & Ægri inde suffocentur, homicidæ sunt.

Cujus ergo animus non abhorret a sceleratis & temerariis, imo nefandis Uroscoporum ausibus?

Quantum itaque, quantum bonorum Principum ac Magistratuum interest, ut felicitatem suorum Subditorum & Civium curantes, tales venenosos refrænent Uroscoporum ausus? Quanta hinc in Universum Orbem, in nostram Rempublicam, imo hancce Provinciam redundarent bona?

Ne autem credant, quod peritis, artemque bene edoctis fucum facere possint Medicis, ignarum decipiant vulgus, abeoque ut docti celebrentur; qui vero Artis salutaris principi-

ci-

cupia probe perspexerit, eorum ineptias parum curabit, eosque considerabit ut tales, Qui omni humanitate privati in Mortales quam maxime sunt injuriosi; Qui tanquam tot ferarum phalanges, Humani generis interitum potius, quam ejusdem salutem, impitantur; Qui, inito quasi fœdere, in Hominum totalem ruinam conspirasse videntur; Qui Hominum sanitati consulere præ se ferentes angue rabidoque cane pejus sunt timendi; Qui.....

Sed me contineam, ne justus furor, ne æqua dedignatio meos affectus nimis vehementer moveat, præsertim, quum video, me Vestris in animis A. O. O. H., eandem jam excitasse flammam, quod dum præstitisse gaudeo, amplissimam laboris mercedem mihi reportasse videor.

Jam vela Orationis contrahere possem, nisi alia de causa me coactum sentirem eadem adhuc parumper expansa tenere; jubet enim pietas, jubet gratitudo, jubet & jucunda præteritorum recordatio, ut ad Vos Me convertam, Viri Clarissimi, Medicinæ & Philosophiæ Professores, ut publice profitear, quanta in meum commodum, quanta in meorum studiorum incrementum præstiti-

teritis, utque debitas pro his omnibus in Me collatis beneficiis persolvam grates. Octo jam sunt præterlapſi anni, per quos Veſtris fidelibus frui licuit Inſtitutionibus, quibus Mihi ſedulo inculcaſtis Medicinæ ac Philoſophiæ fundamenta, optimam deinde ad ulteriores faciendos progreſſus præmonſtrantes viam, nunquam deſuiſtis illuſtrandis dubiis, vel auferendis difficultatibus nonnunquam obortis, ſed facilem ſemper præbuiſtis aditum, nihilque Vobis jucundius fore, quam ſtudiorum meorum incrementum promovere non tantum teſtati fuiſtis, verum & re ipſa comprobaviſtis, omni enim modo ſive in lectionibus publicis, ſive privatis, ſive colloquiis invicem habitis, non raro oſtendiſtis, Me inter cariſſimos Diſcipulos non inſimum tenere locum, Veſtroque amore proſecuti fuiſtis, atque (honori duco) conſortio Veſtro haud indignum judicaſtis.

Quid itaque decentius? Quid honeſtius? Quid magis æquum? Quam quod pro tanta beneficiorum ſerie debitas referam grates; omnia enim, quæ ſcio, omnia quæ didici, unice Vobis debeo, Veſtroque ſub auſpicio, Veſtroque adjumento omnem, quam calleo, comparavi ſcientiam. Gratias itaque ago & habeo
maxi-

maximas pro tot tantisque in Me collatis beneficiis, Meque horum omnium, dum memor ipse Mei, dum Spiritus hos regit artus, memoriam sempiterna benevolentia culturum, gratique animi testimonia exhibiturum, sancte polliceor subnixè interim rogans, ut Vos, Viri Clarissimi, qui Me tantis beneficiis affecistis, ulterius amore Vestro complecti velitis, nihilque Mihi suavius, nihilque jucundius unquam futurum, quam inter Vestros amicos numerari jurare haud vereor, a mea itaque parte omnia contribuere conabor, ut vinculum amicitiae jam copulatum, firmitus constringatur. Ceterum precor D. T. O. M. ut Vos, in bonarum Scientiarum incrementum, Aegrorum salutem, Academiae ornamentum, Familiarum gaudium, diu incolumes servet, crudam largiatur Senectutem, & post corporis fata Vitam Sempiternam.

Ad Vos jam Me converto, Phæbo medenti sacrata Pectora, & inter hæc præ ceteris, Paranymphei carissimi, quorum consortio & familiaritate Mihi per Academicum cursum frui licuit, Vobisque, antequam publice testor, quam gratum illud Vestrum Mihi fuerit consortium, unicum, haud Ægre ferentibus, dabo consilium, ut semper, ubicun-

que

que Terrarum unquam Praxin exercebitis, a pessima illa, ex sola urina Ægri morbum conjiciendi methodo, hodie non tantum inter Uroscopos, verum etiam quam plures Medicos, licet confirmata sancte abstineatis; audivistis enim, quam pessime hoc faciendo errare, Ægrum in vitæ periculum conjicere, imo ipsius mortem causare vel accelerare possetis. Quid autem indignius, quid magis nefandum, quam Hominem, inter omnia Divinæ Manus artificia eminentissimum, immortalī Animā donatum, propria culpa interficere? Vos itaque, Generosi Juvenes, quibus meliora finxit præcordia Titan, abstineatis sedulo a pessimo tali artis abusu, ne conferatis Vos cum talibus infamia notatis hominibus, sed semper Dogmaticam amplectamini Medicinam, Rationalem nempe Experientia comprobata, sic felicem semper & certam exercebitis Praxin, castum & tranquillum Vobis conservabitur animus, faustusque Vobis erit DEUS.

Ceterum etiam Vobis maximas, quas possum, ago gratias, pro amicissima Vestra consortione, ex qua haud parvā Me in studiis promovendis accepisse utilitatem grate recordor, illamque diutius prolongare vellem,

lem; nisi, absoluto jam studiorum Academicorum curriculo, aliorum tendere animus esset. Ne autem credatis, Me unquam, licet a Vobis remotum, obliturum esse blanda illa sæpius repetita colloquia, sociabile illud consortium, sed sæpius illa menti meæ obversabuntur, eique semper infixæ manebunt; Vos itaque, ut eodem modo Me Vestra amicitia per omnem vitam prosequamini, etiam etiamque rogo. Supplex præterea DIVINUM NUMEN precor, ut in studiis Vestris ulterius excolendis Vobis adesse velit, longævam concedat sanitatem, Vobisque quævis bona benigna largiatur, quæ in Vestra commoda, & Proximorum emolumentum cedere possunt.

Tandem ad Vos, cujuslibet Loci, Ordinis, atque Dignitatis Auditorum exoptatissima Concio, Mea se vertit Oratio. Si qui Vestrum sunt, quorum familiaritatis honore, amicitiae favore, consortium delictis Mihi frui contigit, gratias Vobis habeo referoque maximas, pro tot immeritis in Me collatis beneficiis, atque horum omnium memorem & gratum Vobis polliceor animum, SUMMUMQUE NUMEN pro Vestra sanitate, pro Vestra felicitate non raro defatigabo.

D I X I.



